

Turpi ndaj Allahut

Ka argumente të shumta që nxisin për t'u pajisur me turp ndaj Allahut, që është një moral dhe tipar. Gjithashtu sqarojnë për pozitën e lartë që ka turpi dhe rezultat madhështore e të lavdëruara që sjell te besimtari në të dy botët. Abdullah ibn Umeri kishte kaluar pranë një personi i cili e qortonte vëllain e tij për shkak se ai ishte i turpshëm, se kjo (sipas tij) po ia ulte pozitën, se nuk ishte sa duhej produktiv etj. Atëherë Pejgamberi salAllahu alejhi ue selem ka thënë: "***Lëre mos e qorto, ngase turpi është prej besimit!***" Në një tjetër hadith ka thënë: "***Turpi është një degë prej degëve të besimit.***" Dhe ka thënë: "***Turpi sjell vetëmse mirësi.***" Dhe: "***Turpi është mirësi i tëri.***" Për këtë, Pejgamberi salAllahu alejhi ue selem i ka thënë Abdul Kajsit: "***Ti ke dy cilësi, të dyja ato i do Allahu: maturinë dhe turpin.***"

Turpi me pozitën më të lartë dhe rëndësinë më të madhe, si dhe të cilit duhet t'i kushtojmë kujdes më së shumti, është *turpi ndaj Allahut*, së pari. Ai na sheh kudo që jemi. Atij nuk i fshihet asgjë, as lëvizja më e vogël. Allahu thotë: "***...a nuk e di ai se Allahu i sheh të gjitha?!***" Alek 14. Dhe: "***Allahu është përherë Mbikëqyrës mbi ju.***" Nisa 1. Dhe: "***Allahu e sheh mirë atë që vepron.***" Enfal 72. Duhet të kemi turp prej Allahut i Cili na sheh dhe e di gjendjen tonë, brendësinë tonë, mendimet tona, dhe i di veprat tona të jashtme. Ai na sheh kur jemi vetëm, kur jemi në publik.

Asnjë vepër, mendim, qëllim e dëshirë nuk i fshihet Allahut. Aq më tepër veprat tona të jashtme, të dukshme.

Turpi ndaj Allahut shtohet përmes tri gjërave:

1. Vështrimit në mirësitë e Allahut ndaj teje. Ai në çdo sekondë e çast të jep prej mirësive e dhuntive të tij.
2. Vështrimit në mangësitë e tua. Ti je i mangët në raport me Allahun, në plotësimin së drejtës së Tij-kryerjes së obligimeve dhe largimit nga ndalesat e mëkatet.
3. Të dish se Allahu të sheh dhe e di gjendjen tënde në çdo kohë dhe vend. Atij nuk i fshihet asgjë.

Kur plotësohen këto tri gjëra dhe i bashkon në zemrën tënde, atëherë patjetër do të kesh turp ndaj Allahut. Pastaj prej kësaj zemre do të burojë çdo mirësi dhe virtyt, **"Turpi sjell vetëmse mirësi"**. Kur turpi ndaj Allahut gjendet në zemrën e besimtarit, atëherë ai do të ndalet nga moralet e ulëta, sjelljet e këqija ndaj të tjerëve, do të ndalet nga ndalesat e mëkatet, e gjithashtu do të kryejë obligimet dhe do të pajiset me morale fisnike. Në këtë mënyrë do të jetë me ndjenjën se është nën mbikëqyrjen e Allahu vazhdimisht, në çdo kohë e vend.

Pejgamberi salAllahu alejhi ue selem ka thënë: **"Të keni trup prej Allahut ashtu siç e meriton Ai!"** I thanë: **"Vërtet ne kemi trup prej Allahut."** Mirëpo, ai salAllahu alejhi ue selem ua ka shpjeguar se cili është trupi i vërtetë që duhet pasur në raport me Allahun, ka thënë: **"Nuk është ashtu siç po mendoni ju. Turpi**

ndaj Allahut është të ruash kokën dhe çdo gjë të saj, të ruash barkun dhe çdo gjë ka ai dhe të kujtosh vdekjen. Kush ka për qëllim botën tjetër, i braktisë stolitë e kësaj bote. Kush vepron kështu, është ai i cili ka turp Allahun ashtu siç e meriton Ai."

Turp i vërtetë kërkon katër gjëra:

1. Ruajtjen e kokës dhe çdo gjë që përfshin ajo, si: dëgjimin, shikimin, gjuhës. Ajo që kërkohet prej njeriut është që të ruajë këto të gjitha, pra të mos dëgjojë gjëra me të cilat e zemëron Allahun, të mos shikojë gjëra me të cilat e zemëron Atë, të mos flasë fjalë me të cilat e zemëron Atë. Turpi i vërtetë patjetër se do ta ketë këtë rezultat.

2. Ruajtja e barkut (batn përfshin pjesën e stomakut e përreth) dhe çdo gjë që përfshin ai, si: zemrën, që është më e rëndësishmja, vendi ku vendoset turpi, origjina e turpit, e nëse në zemër arrin ta realizosh turpin pastaj të gjitha gjymtyrët do të përmirësohen, përfshin gjithashtu stomakun, pra të hajë e pijë gjëra të lejuara dhe që janë fituar me mënyra të lejuara.

3. Mospreokupimi me gjërat e bukura të kësaj jete. Por, vazhdimisht t'ia kujtojë vetes se do ta takojë Allahun një Ditë dhe do të largohet nga kjo jetë.

4. Të vendos para syve botën tjetër, ta ketë synim atë. Me veprat e tij gjithmonë duhet të synojë Allahun dhe botën tjetër. Në këtë mënyrë, duke pasur këtë synim, do të ecën përpara me adhurime të pastra dhe morale të mira, derisa ta takojë Allahun, **"Sa për atë që dëshiron botën tjetër dhe përpiket për të me gjithë shpirt e**

duke qenë besimtar, përpjekja e tij do të shpërblehet." Isra 19.

Kujt i largohet turpi prej zemrës, do të mblidhen shpejt tek ai të këqijat, në zemrën dhe trupin e tij. Pejgamberi salAllahu alejhi ue selem ka thënë: "Prej fjalëve të Pejgamberëve të parë e që është përcjell nga njerëzit vazhdimisht është: **"Nëse nuk ke turp, vepro çfarë të duash!"** Ky hadith tregon qartazi se atij që i largohet turpi prej zemrës, ai nuk i kushton rëndësi e vëmendje se çfarë vepron, kështu vepron mëkate e të këqija, nuk e ka problem këtë, shpirti i tij ambientohet me to, zemra e tij është e sëmurë sepse nuk ka turp. Kjo gjendje do ta dërgojnë drejt humnerave të shkatërrimit. Andaj e kemi për obligim të përmirësojmë veten tonë sa jemi në këtë jetë, si dhe të përpiqemi të shtojmë turpin ndaj Allahut, i Cili na ka krijuar prej asgjëje, dhe krahas kësaj na ka dhënë të gjitha të mirat, të llojllojshme, vazhdimisht. T'ia kujtojmë vetes se Allahu na sheh neve në çdo gjendje dhe rrethanë që jemi.

Hoxhë Lulzim Perçuku – Dersi “Turpi ndaj Allahut”.